

LUSTER SMÅKRAFT AS
c/o Luster Energiverk AS, Gaupnegrandane 4
6868 GAUPNE

Vår dato: 13.05.2025

Vår ref.: 202115667-31 Oppgi ved kontakt

Dykkar ref.:

NVE gir løyve til bygging av Døsjagrovi kraftverk i Luster kommune

Vi viser til søknad daterte 02.12.2022 om løyve til bygging av Døsjagrovi kraftverk i Luster kommune i Vestland fylke.

NVE gir løyve til etter vassressurslova § 8 til bygging av Døsjagrovi kraftverk. NVE meiner at kriteria i vassressurslova § 25 er oppfylte. Etter vår vurdering er fordelane for allmenne og private interesser større enn ulempene ved tiltaket. Utbygginga vil medføre noko landskapsinngrep, særleg knytt til røyrgatetraséen som slyngjer seg nedover lisida. Inngrepet vil vere godt synleg frå andre sida av fjorden i anleggsperioden og fram til området er revegetert. Den nye røyrgatetraséen vil også føre til at det meste av ein eldre oppmura røyrgatetrase må fjernast. Delar av tiltaksområdet ligg innanfor aktsemdsområde for kvikkleire, og NVE meiner det ikkje er tilstrekkeleg dokumentert at tiltaket verken kan bli utsett for eller utløyse skredhendingar.

Etter NVE sitt syn kan dei negative konsekvensane av tiltaket reduserast tilstrekkeleg gjennom avbøtande tiltak. Vi stiller derfor krav om at skredfare i anleggs- og driftsfasen skal utgreiast før Luster Småkraft AS sender inn detaljplan. Dei skal bevare delar av den oppmura røyrgatetraséen av omsyn til kulturminne, og sleppe minstevassføring av omsyn til naturmangfald og landskapsoppleving.

Ei nærare grunngiving for løyvet er gitt i vedlagde notat: *Bakgrunn for vedtak*. Merknadene til vilkåra i dette notatet inneheld krav til utforming av anlegget. Notatet er også tilgjengeleg på NVE si nettside: www.nve.no/8741/V.

Dette løyvet gir ikkje ekspropriasjonsløyve. Tiltakshavar har sjølv ansvar for å avklare dei privatrettslege forholda til eventuelle andre rettshavarar i området.

Orientering av grunneigarar og rettshavarar

NVE ber om at dette brevet med vedlegg så snart som mogleg blir sendt til ramma grunneigarar/rettshavarar. Både eigarar av utbygde og ubygde eigedommar skal varslast. NVE ber om å få ei stadfesting når de har orientert ramma grunneigarar og rettshavarar, med dato for utsendinga.



Vidare saksbehandling

Før du bygger Døsjagrovi kraftverk må du:

Søkje om å få vedtak om konsekvensklasse for dam og vassveg

Konsekvensklassen avgjer kva tryggingskrav som blir stilte til planlegging, bygging og drift av kraftverket, og må vere avklart før arbeidet med tekniske planar startar. Regelverk, retningslinjer og rettleiarar for klassifisering og tekniske planar for vassdragsanlegg finst på <https://www.nve.no/damsikkerhet-og-energiforsyningsberedskap/damsikkerhet/regelverk/>.

NVE sitt miljøtilsyn vil ikkje ta detaljplanen til behandling før anlegget har fått vedtak om konsekvensklasse for dam og vassveg.

Få godkjent detaljplan

Ein detaljplan for miljø og landskap er ei grundig beskriving av tiltaket, og korleis det skal utførast. Anleggsarbeid må ikkje setjast i gang før detaljplanen er godkjend av NVE. Tiltakshavar har ansvar for at detaljplanen er i samsvar med konsesjonen, og dessutan kommunal reguleringsplan og/eller arealplan. NVE sine rettleiarar 4/2013 «Rettleiar til forskrift om internkontroll etter vassdragslovgjevinga» og 3/2013 «Veileder for utarbeidelse av detaljplan for miljø og landskap for anlegg med vassdragskonsesjon» er tilgjengelege på <https://www.nve.no/energi/tilsyn/miljoetilsyn-vassdragsanlegg/>.

Søknad om detaljplan blir send til NVE sitt miljøtilsyn, som vil følgje opp anlegget i plan-, anlegg- og driftsfase.

Få nødvendige løyve etter energilova

I tillegg til konsesjon etter vassressurslova, må du ha nødvendige løyve etter energilova før utbygginga kan starte. Samtidig med innsending av detaljplan må det liggje føre ei endeleg avklaring frå netteigar om at det er ledig kapasitet i lokalt og overliggjande nett. Tilknytning av høgspenningsanlegg må vere avklart med områdekonsesjonær. Detaljplanen vil ikkje bli godkjend før dette ligg føre.

Idriftsetjing

Når kraftverket blir sett i drift, skal følgjande skjema fyller ut og blir sendt til NVE: «Melding om idriftsetjing nye vasskraftverk eller opprustings- og utvidingstiltak i eksisterande kraftverk». Skjemaet er tilgjengeleg på <https://www.nve.no/om-nve/skjema-og-rapporteringsordninger/>

Kraftverk med generatoryting over eller lik 100 kVA har registreringsplikt etter skattelovgivinga. All kraft produsert i slike anlegg er også avgiftspliktig. Meir informasjon finst i «Årsrundskriv for avgift på elektrisk kraft», tilgjengeleg på <https://www.skatteetaten.no>.

Vedtaket kan klagast på

Vedtaket kan klagast på, sjå opplysningar om rett til å klage på siste side. Eventuelle klagar vil bli sendt til Luster Småkraft AS til fråsegn før saka blir lagt fram for Energidepartementet.



Med helsing

Carsten Stig Jensen
konsesjonsansvarleg

Brit T. Haugen
fagleiar

Dokumentet sendes uten underskrift. Det er godkjent i henhold til interne rutiner

Vedlegg: Bakgrunn for vedtak
Vassdragskonsesjon

Mottakarliste:
LUSTER SMÅKRAFT AS

Kopimottakarliste:
STATNETT SF
LUSTER KOMMUNE
STATSFORVALTAREN I VESTLAND
VESTLAND FYLKESKOMMUNE
BREHEIM NETT AS
HÅKON FUHR
TORKJEL LAVOLL
HANS H URDAHL



Orientering om rett til å klage

Frist for å klage	Fristen for å klage på vedtaket er 3 veker frå den dagen vedtaket kom fram til deg. Dersom vedtaket ikkje har kome fram til deg, startar fristen å gå frå den dagen du fekk eller burde ha fått kjennskap til vedtaket. Det er tilstrekkeleg at du postlegg klagen før fristen går ut. Klagen kan ikkje handsamast dersom det har gått meir enn 1 år sidan NVE fatta vedtaket.
Du kan få grunngjeving for vedtaket	Dersom du har fått eit vedtak utan grunngjeving, kan du be NVE om å få ei grunngjeving. Du må be om grunngjevinga før klagefristen går ut.
Kva skal med i klagen?	Klagen bør vere skriftleg. I klagen må du: • Skrive kva for vedtak du klagar på. • Skrive kva for eit resultat du ønsker. • Opplyse om du klagar innanfor fristen. • Underteikne klagen. Dersom du brukar ein fullmektig, kan fullmektigen underteikne klagen. I tillegg bør du grunngje klagen. Dette betyr at du bør forklare kvifor du meiner vedtaket er feil.
Du kan få sjå dokumenta i saka	Du har rett til å sjå dokumenta i saka, med mindre dokumenta er unnateke offentlegheit. Du kan ta kontakt med NVE for å få innsyn i saka.
Vilkår for å gå til domstolane	Dersom du meiner vedtaket er ugyldig, kan du gå til søksmål. Du kan berre gå til søksmål dersom du har klagt på vedtaket til NVE, og klagen er avgjort av ED som overordna forvaltingsmyndigheit. Du kan likevel gå til søksmål dersom det har gått 6 månader sidan du sende klagen, og det ikkje skuldast forsøming frå di side at klagen ikkje er avgjort.
Sakskostnader	Dersom NVE eller ED endrar vedtaket til din fordel, kan du søke om å få dekkar vesentlege og nødvendige kostnader. Du må søke om dette innan 3 veker etter at klagevedtaket kom fram til deg.
Kven kan klage på vedtaket?	Dersom du er part i saka, kan du klage på vedtaket. Du kan også klage på vedtaket dersom du har rettsleg klageinteresse i saka.
Kvar skal du sende klagen?	Du må adressere klagen til Energidepartementet (ED), men sende han til NVE. E-postadressa til NVE er: nve@nve.no. NVE vurderer om vedtaket skal endrast. Dersom NVE ikkje endrar vedtaket vil vi sende klagen til ED.

Denne forklaringa bygger på forvaltningslova sine reglar i §§ 11, 18, 19, 24, 27 b, 28, 29, 31, 32 og 36.